

pon vnd Malacca vil zu dem Leben gebracht.
 Andere bezeugen von ihm/ daß deren vom
 Todt erweckten ein grosser Hauff gewesen/
 deren Anzahl so vil man namhafte von ihm
 weiß vor vnd nach seinem Tode/ sich auff
 fünff vnd zweynzig verlaufft. In der Land-
 schafft Piscaria in der Revier Combature
 ware ein Knab in einen Brunnen gefallen
 vnd ertruncken: disen ziehet man heraus
 wolte ihn zu Grab tragen: ohngefahr gehet
 Franciscus fürber auß der nächsten Kir-
 chen St. Stephant da er Mess gelesen/ vnd
 als er die Mutter weynend sihet gegen ihm
 lauffen/ vnd zu Füßen fallen/ wird er auß
 Mitleyden bewegt/ gehet zu der Leich/ knyet
 nider/ vnd nach verrichtem Gebett/ nimbt
 er den verstorbnen Knaben bey der Hand/
 vnd spricht; im Namen Jesu Christi stehe
 auff: vnd von stundan hebet sich der Knab
 in die Höhe/ die umbstehende rüffen mit hel-
 ler Stimm das Wunderwerck auß/ vnd
 dancketen Gott der seinen Dieneren ein sol-
 chen Gewalt mittheylet.

In Musan (ist ein Landschafft in den